

Consecuencianan di cria 2.000 ton di pisca pa naturalesa y medio ambiente di Aruba no ta completamente cla ainda

E rapport di impacto ambiental di e criamento anual di finalmente 2.000 ton di red snapper (pisca cora) na Aruba no ta completo ainda, segun Comision pa e reportahe di impacto ambiental di Hulanda. Mester di un miho bista riba e consecuencianan pa e rif di coral. E rapport tampoco no ta muestra cu tin suficiente capacidad pa purifica awa sushi di e proyecto y otro desaroyonan den futuro na Aruba.

E compania Petros Aquaculture Operations kier cria red snapper (pisca cora) na Aruba pa exportacion y consumo local. E proyecto ta inclui un criadero di pisca, planta di procesamento y pier riba e isla y haula di pisca riba lama. Produccion ta cuminsa cu 500 ton di pisca pa aña y finalmente ta yega 2.000 ton. E rapport di impacto ambiental ta stipula e consecuencianan pa naturalesa y medio ambiente. Riba peticion di gobierno di Aruba e Comision a evalua e rapport aki contra e normanan internacional di mas halto. E no ta evalua si e proyecto ta deseabel, pero ta mira solamente e calidad di e informacion den e rapport.

Simone Filippini, presidente di e grupo di trabou di conseho: “Aruba ta mustrandó liderazgo door di laga traha y evalua independientemente un rapport di impacto ambiental. Cu e adicionnan cu nos ta propone, pronto Aruba lo por tuma un decision den cual ta tene cuenta cu tur efecto ambiental, social y socioeconomico di e proyecto aki.”

E Comision ta recomenda entre otro pa duna mas informacion tocante e ecosistema marino di Aruba cu ta hopi vulnerabel. E rif di coral ta deteriorando rapidamente pa añanan caba. E excremento di e pisca den e cashinan por dañá e rif di coral mas ainda. E Comision ta recomenda pa evalua e impacto riba e rif di coral na un produccion di 2.000 ton di pisca pa aña. Investigá e posibilidatnan pa trata awa shushi denter di e proyecto si e plantanan di tratamentu di e isla no tin suficiente kapasidat, segun loke a indika e Comision.

Ademas, e Comision ta tuma nota cu tin incertidumbre pa loke ta trata e factibilidad practico di e proyecto y su impactonan ambiental y socioeconomico. Pa e motibo aki, un momento di decision interino y bon monitor y evaluacion di e prome fase di proyecto ta di gran importancia prome cu gobierno tuma un decision riba escalacion te cu 2.000 ton.

Gobierno di Aruba a indica cu lo adopta e recomendacionnan di e Comision, laga complementa e rapport di impacto ambiental den futuro cercano y despues bolbe entrega esaki na e Comision pa un recomendacion final.

E Comision independiente di reportahe di impacto ambiental ta duna conseho riba e contenido y calidad di rapportnan di impacto ambiental. Pa cada proyecto, e ta lanta un grupo di trabou di expertonan independiente. E Comision no ta skirbi rapportnan di impacto ambiental, e iniciado si. E autoridad competente – den e caso aki un cantidad di minister di e pais Aruba – ta dicide riba e proyecto. Mira tambe www.commissiemer.nl.

Nota pa redaccion

Bo ta haya e conseho completo riba e [website](#).

Pa mas informacion por yama nos oficial di prensa: Daan de Wit, 00 31 6 15 28 37 74.